

ACTA DA SESIÓN ORDINARIA DO CONCELLO PLENO DO 06.04.2017

No salón de sesións da Casa Consistorial do Concello de Fene (A Coruña), cando son as 18.00 h do 06.04.2017, baixo a presidencia do alcalde Juventino José Trigo Rey, reúnese, en primeira convocatoria, o Pleno do Concello ao obxecto de realizar a sesión ordinaria convocada para hoxe.

Asistiron os/as concelleiros/as:

Gumersindo Pedro Galego Feal, Rocío Aurora Bértoa Puente, Juan José Franco Casal, Alejandro Jorge Gutiérrez Sánchez, Juana Barro Couto, José Andrés Serantes Panceiras, Ana María Novo Picos, Alejandra Permuy Meizoso, Justo Martínez Ardá, María Manuela Aguilar Prieto, Antón Lois Noceda Carballo, Joaquín Julián Ayala Garrido, Amalia García Balado, Xoán Manuel Rodríguez Bastida, César Daniel Castro García e María del Carmen Martínez Rodríguez

Secretaria:

Estefanía Manteiga Lamas

Interventora:

Iria Luisa Díaz Gavela

A Presidencia, tras comprobar nos termos expostos que se dá o quórum legalmente esixido segundo o artigo 90.1 do Real decreto 2568/1986, do 28 de novembro, declara aberta a sesión e procede ao estudo e exame dos asuntos incluídos na orde do día da convocatoria.

1. Aprobación, se procede, da acta da sesión ordinaria do 04.01.2017

Por parte do voceiro do grupo do PP Gumersindo Pedro Galego Feal solicítase que se rectifique un erro no punto 5 de rogos e pregunta de tal forma que onde di "compensar ata o 100% as retribucións dos traballadores con baixa sindical" debe dicir "compensar ata o 100% as retribucións dos traballadores con baixa laboral".

Con esta rectificación a acta queda aprobada.

2. Dación de conta das Resolucións da alcaldía dende o núm. dende o núm. 220/2017 ao núm. 351/2017

Os concelleiro danse por informados

3. Aprobación, se procede, da proposta de adhesión á Asociación de Concellos do Camiño Inglés e designación do representante municipal

Consta no expediente a seguinte Proposta da alcaldía que foi ditaminada favorablemente por 3 votos a favor (2 do grupo do BNG e 1 do grupo mixto) e 2 abstencións (1 do grupo do PP e 1 do grupo Somos Fene) na Comisión de Dinamización Económica que tivo lugar o 27.03.2017:

"PROPOSTA DA ALCALDÍA

ASUNTO: adhesión á Asociación de Concellos do Camiño Inglés e designación do representante municipal.

A meirande parte dos Concellos polos que transcurre o Camiño Inglés están interesados en formar unha asociación coa que potenciar turisticamente este importante valor do noso patrimonio.

Actualmente aprobaron os estatutos desta asociación, todavía pendente de se constituir, os Concellos de Abegondo, Betanzos, Cabanas, Carral, Mesía, Miño, Narón, Neda, Ordes, Paderne, Pontedeume e Santiago.

É competencia dos Concellos segundo o artigo 25.2 LBRL a información e promoción da actividade turística de interese e ámbito local.

O artigo 5 da Lei de turismo de Galicia atribúe aos municipios as seguintes competencias en materia turística:

- a) A protección e a promoción dos recursos turísticos do seu termo municipal.
- b) O desenvolvemento de infraestruturas turísticas no ámbito da súa competencia.
- c) Promover a declaración de municipio turístico e de festas de interese turístico.
- d) A potenciación e a promoción da denominación de xeodestino, segundo a definición contida no artigo 23.1, do que formen parte, sempre baixo a marca turística «Galicia».
- e) A colaboración coa Administración autonómica en proxectos e iniciativas de fomento e promoción turística instrumentada a través de fórmulas cooperativas axeitadas en cada caso.
- f) A posibilidade de participación, por instancia da Administración autonómica, no proceso de elaboración de plans de ordenación, promoción e investimento en materia turística.
- g) O exercicio das competencias turísticas que lles sexan atribuídas pola Administración da Xunta de Galicia, de acordo co establecido pola lexislación de réxime local.
- h) A colaboración coa Xunta de Galicia na protección dos dereitos das usuarias e dos usuarios turísticos.”

Á vista dos fins que persigue esta asociación, considérase que pode axudar a potenciar as competencias que o Concello de Fene pode desenvolver no seu ámbito de actuación.

Examinados os estatutos da asociación emitiuse un informe favorable con observacións por parte da secretaría e intervención municipal o 22.03.2017.

Por este motivo, propoño ao Pleno da Corporación a adopción do seguinte ACORDO:

- 1º.-Integrarse como socio fundador na Asociación de Concellos do Camiño Inglés
- 2º.-Aprobar os estatutos da Asociación de Concellos do Camiño Inglés que se insiren como anexo.
- 3º.- Designar como representante político no acto constitutivo e como representante permanente na asociación ao concelleiro de Promoción económica.
- 4º.-Designar como representante técnico na asociación á empregada Belén Souto Calvete.

Fene, 22 de marzo de 2017

O alcalde

Juventino José Trigo Rey

ANEXO

ESTATUTOS ASOCIACIÓN DE CONCELLOS DO CAMIÑO INGLÉS

CAPÍTULO I DA ASOCIACIÓN EN XERAL

Artigo 1º.-

1. Constitúese unha asociación sen ánimo de lucro das previstas na Lei orgánica 1/2002, do 22 de marzo, reguladora do dereito de asociación, e tendo en consideración a Disposición Adicional quinta da Lei 7/1985, de 2 de abril, reguladora das Bases do Réxime Local, e demais disposicións legais. A asociación ten a seguinte denominación: "ASOCIACIÓN DE CONCELLOS DO CAMIÑO INGLÉS"

2.- A asociación rexeráse polos ditos estatutos, pola Lei orgánica 1/2002, do 22 de marzo e pola demais lexislación existente en materia de asociacións que lle sexa aplicable.

Artigo 2º.-

1. A asociación terá sede rotatoria entre os concellos membros. Estará emprazada no municipio no que o seu alcalde ocupe a presidencia.

2. No momento de constitución o domicilio principal da asociación radicará na localidade de Carral, na Casa da Cultura, rúa de Paleo, nº 17, C.P. 15175, provincia da Coruña e teléfono 981672580.

Artigo 3º.- A asociación, en funcións dos seus fins e do emprazamento do seu domicilio social, exercerá fundamentalmente as súas actividades no ámbito territorial da provincia da Coruña.

Artigo 4º.-

1.- A asociación constitúese por tempo indefinido e só se disolverá, conforme a estes estatutos, pola vontade dos asociados expresada en asemblea xeral extraordinaria ou polas causas previstas na lexislación vixente.

2.- A asociación nace sen patrimonio propio e aterase no seu réxime económico ás seguintes premisas:

- a. Terá un carácter non lucrativo.
- b. Para o cumprimento dos seus fins a Asociación contará cun orzamento formado por achegas anuais dos seus membros.
- c. Todos os seus ingresos aplicaranse aos fins que constitúen o obxecto desta asociación, sen que caiba en ningún caso a súa repartición entre os asociados, nin a súa cesión gratuíta a persoas físicas ou xurídicas con interese lucrativo.
- d. O seu patrimonio será independente do dos seus asociados.
- e. Os beneficios obtidos pola asociación, derivados do exercicio de actividades económicas, incluídas as prestacións de servizos, deberán destinarse exclusivamente ao cumprimento dos seus fins, sen que caiba en ningún caso a súa repartición entre asociados, nin a súa cesión gratuíta a persoas físicas ou xurídicas con interese lucrativo.
- f. Anualmente a xunta directiva presentará á asemblea unha memoria económica do exercicio xa rematado, xunto cos xustificantes de gasto que deberán ser de valor legal. Esta memoria deberá ser aprobada pola asemblea de socios.
- g. Para a contratación de servizos ou investimentos, a asociación estará suxeita á lexislación vixente de Contratos do Sector Público.

3. A asociación rexeráse segundo os principios democráticos contidos no marco da Constitución e o resto do ordenamento xurídico.

Artigo 5º.-

1. Son fins principais da asociación:

- a. Promover o desenvolvemento turístico dos concellos do Camiño Inglés, achegando a cooperación destas institucións locais e contando co apoio da Deputación Provincial, da Comunidade Autónoma, a Administración do Estado e mancomunidades ou outra forma de agrupación de concellos afectados polo Camiño Inglés.
- b. Promover a defensa e mellora do patrimonio natural e histórico-artístico do Camiño Inglés.

- c. Planificar e desenvolver iniciativas de desenvolvemento sostible do territorio do Camiño Inglés.
 - d. Canalizar a promoción turística do Camiño Inglés, así como a elaboración de programas turísticos e medioambientais.
 - e. Ofrecer o apoio necesario aos peregrinos que transitan polo roteiro xacobeo do Camiño Inglés.
 - f. Desenvolver relacións de reciprocidade entre os concellos e territorios, fomentado e propoñendo iniciativas concretas que favorezan incrementos do movemento turístico, a implantación nos mercados nacionais e internacionais e a identidade de conxunto do territorio entre as grandes rutas viaxeiras do mundo.
 - g. Incluír este proxecto no marco dos programas da Unión Europea e/ou doutras institucións, destinados a axudar a novas iniciativas que potencien os destinos turísticos europeos e que precisen da súa presentación de forma conxunta e coordinada.
 - h. Planificar actuacións turísticas e de difusión de imaxe conxunta, que se corresponda cos intereses dos membros desta Asociación.
 - i. Participar e colaborar activamente cos plans da Deputación Provincial, da Comunidade Autónoma e da Administración do Estado neste territorio.
 - j. Representar aos concellos do Camiño Inglés en cantos proxectos, convenios, acordos ou similares de carácter público ou privado se orienten ao cumprimento destes obxectivos e fins.
 - k. Procurar a unión de iniciativas que en materia de desenvolvemento e promoción do Camiño Inglés leven a cabo outros organismos públicos e privados.
 - l. Fomentar o contacto e relación con outras entidades de natureza análoga que teñen entre os seus fins a promoción e defensa das diversas variantes do Camiño de Santiago.
2. Para levar a cabo os seus fins a asociación poderá:
- a. Establecer as estruturas orgánicas e administrativas pertinentes.
 - b. Facilitar o intercambio de información sobre temas relacionados co Camiño Inglés nos concellos membros.
 - c. Constituír os servizos de asesoramento e asistencia para os seus membros.
 - d. Dirixirse aos poderes públicos e intervir con carácter consultivo, no seu caso, na formulación da normativa legal que afecte aos seus municipios.
 - e. Organizar e participar en reunións, seminarios e congresos.
 - f. Promover publicacións e documentos nas materias propias das súas competencias.
 - g. Realizar calquera outra actividade con suxeición á lexislación vixente.
 - h. Planificar e executar programas anuais en directa relación coa súa finalidade e obxectivos.

CAPÍTULO II DOS ASOCIADOS

Artigo 6º.-

1. Poderán formar parte da asociación todos os concellos polos que transcorra o percorrido xacobeo do Camiño Inglés. O acordo de integración deberá ser adoptado polo órgano competente da corporación interesada, no que se expresará a súa vontade de adhesión e cumprimento dos presentes estatutos.

2. A alta será solicitada polo alcalde ou presidente da Corporación mediante escrito dirixido ao Presidente da asociación, quen dará conta á asemblea xeral, que acordará acceder ou non á admisión.

3. Calquera membro pode separarse previo acordo plenario da Corporación correspondente. Dita separación fornecerá efectos a partir da toma de coñecemento da asemblea xeral.

4. O membro que, por calquera causa, deixase de pertencer á asociación, acharase suxeito ao cumprimento dos compromisos e obrigacións contraídas.

Artigo 7º.- Dereitos dos membros da asociación:

- a. Asistir con voz e voto ás asembleas e reunións que se celebren.
- b. Ser candidatos aos cargos dos órganos de goberno.
- c. Participar nas áreas da asociación.
- d. Ter acceso aos arquivos, rexistros e documentos.
- e. Ter coñecemento da execución do orzamento.
- f. Solicitar ao presidente reunir á asemblea xeral, segundo os casos, cando estimen que os seus dereitos foron vulnerados, sen prexuízo da impugnación de acordos e poidan formular segundo a lexislación vixente.

Artigo 8º.- Obrigas dos socios da asociación:

- a. Cumprir os presentes estatutos e os acordos válidos da asociación e os seus órganos de goberno.
- b. Pagar as cotas regulamentarias e as achegas extraordinarias que, no seu caso, puidesen establecerse.
- c. Velar pola consecución dos fins propostos, cumprindo con exactitude as disposicións estatutarias e os regulamentos.

Artigo 9º. A condición de socio alterarase por algún dos seguintes motivos:

- a. Por acordo da corporación correspondente, segundo o disposto no artigo 6.3.
- b. Por deber máis dunha cota, perderase o dereito de voto nos órganos da asociación. Así mesmo, ningún concello con cotas pendentes poderá ser membro da xunta directiva.
- c. Os concellos que están neste suposto, verán reducida a súa presenza nas accións promocionais que a asociación desenvolva, así como nos materiais editados pola mesma durante ese período.
- d. Perderase a condición de socio da asociación, por falta de pagamento de 3 cotas ou máis, cando unha vez realizado o requirimento, pasasen máis de tres meses sen o pago das cotas debidas.

Artigo 10º.- Membro amigo

1. Poderán participar na asociación os denominados Membro Amigo que serán entidades públicas ou privadas que teñan entre os seus obxectivos o desenvolvemento, defensa e promoción do Camiño Inglés.
2. A condición de Membro Amigo supón que pode participar nas reunións e asembleas da asociación con voz pero sen voto, non poderá formar parte dos órganos de goberno e non ten a obriga do pagamento de cotas.
3. Para obter a condición de Membro Amigo a entidade ou organismo interesado deberá solicitar á presidencia a admisión argumentando o seu vencello co Camiño Inglés. Será a asemblea xeral a que acorde acceder ou non á admisión.

CAPÍTULO III

DOS ÓRGANOS DA ASOCIACIÓN

Artigo 11º.- Os órganos de goberno da asociación son os seguintes:

- Asemblea xeral onde están representados todos os socios.
- Xunta directiva, que é o órgano do goberno da asociación e está formada polo presidente, un vicepresidente, un secretario, un tesoureiro e tres vogais.

Cada vogal representará aos seguintes treitos do Camiño Inglés e será escollido entre eles:

- Treito Ferrol-Bruma (Mesía): Ferrol, Narón, Neda, Fene, Cabanas, Pontedeume, Miño, Paderne e Betanzos.
- Treito A Coruña-Bruma (Mesía): A Coruña, Culleredo, Cambre, Carral e Abegondo.
- Treito Bruma (Mesía)-Santiago de Compostela: Mesía, Ordes, Oroso e Santiago de Compostela.

Artigo 12º.- A asemblea é o órgano soberano da asociación e está formada por todos os representantes das Corporacións asociadas, cargo que recaerá nas persoas que estas designen de conformidade coa súa normativa.

Artigo 13º.- Son competencias da asemblea xeral:

- a. Aprobar a modificación dos estatutos
- b. Aprobar o plan de actuacións da asociación
- c. Aprobar os orzamentos e contas xerais, así como o regulamento de réxime interno
- d. Aprobar as cotas ordinarias e achegas económicas extraordinarias
- e. Disolver a asociación
- f. Establecer a estrutura organizativa
- g. Aplicar o réxime disciplinario e sancionador nos supostos previstos nos Estatutos e Regulamento Interno que os desenvolven.
- h. Aprobar a admisión de novos socios e membros amigo.

Artigo 14º.-

1. As sesións que celebre a asemblea xeral poderán ser ordinarias e extraordinarias.
2. A asemblea reunirse con carácter ordinario polo menos unha vez ao ano, sendo convocada polo Presidente cun mínimo de sete días de antelación á data de celebración da mesma.
3. A asemblea reunirse con carácter extraordinario cantas veces sexa necesario, sendo convocada pola presidencia ou a petición dun terzo dos socios. A convocatoria farase coa mesma antelación prevista no apartado anterior.
4. As asembleas xerais, tanto ordinarias como extraordinarias, quedarán validamente constituídas en primeira convocatoria cando concorran a ela dous terzos dos asociados con dereito a voto; en segunda convocatoria, que se celebrará polo menos media hora máis tarde da primeira, quedará constituída a asemblea sempre que asistan o presidente e polo menos un terzo dos socios, coa excepción regulada no artigo 25 para a modificación de estatutos. Exercerà a secretaría tanto da Asemblea Xeral como das reunións da xunta directiva a persoa que ostente a xerencia da Oficina Técnica de Xestión podendo o presidente auxiliarse, cando a xerencia corresponda a persoa distinta e se o considera necesario polo secretario xeral do concello que preside ou técnico en quen delegue.

Artigo 15º.- Tanto para a asemblea ordinaria, como para a extraordinaria, a convocatoria haberá de facerse por escrito, expresando o lugar, o día e a hora de celebración da mesma.

Acompañarase á convocatoria a Orde do Día, comprensivo dos asuntos para tratar, debéndose incluír naquel, necesariamente, calquera tema que estando dentro dos fins desta asociación, fose expresamente solicitado polo menos por un terzo dos membros.

Artigo 16º.- Os acordos adoptaranse por maioría. En caso de empate, decidirá o voto de calidade do presidente.

Será necesario maioría cualificada das persoas presentes ou representadas, que resultará cando os votos afirmativos superen a metade destas, para:

- a. Nomeamento das xuntas directivas e administradores
- b. Acordo para constituír unha federación de asociacións ou integrarse nelas
- c. Disposición ou alleamento de bens integrantes do inmovilizado
- d. Modificación de estatutos
- e. Destitución do presidente
- f. Disolución da entidade

Artigo 17º.- As Asembleas estarán presididas polo presidente, asistido do secretario, quen levantará acta da sesión, na que se reflectirán as propostas e resolucións adoptadas.

Artigo 18º.- A presidencia da asociación será elixida entre os concellos que desexen ostentala e ratificada pola asemblea xeral. O vicepresidente, o secretario, o tesoureiro e os tres vogais que completan a xunta directiva tamén serán elixidos entre os asociados que se postulen. No caso de que non exista o número de concellos necesario para postularse para a xunta directiva, elixiranse entre aqueles concellos que aínda non ocuparan postos directivos.

A vicepresidencia substituirá á presidencia en caso de ausencia e en casos concretos poderá recibir a delegación do exercicio das súas competencias.

Artigo 19º.-

1. A duración do mandato do presidente será de dous (2) anos.

2. Calquera dos membros da Xunta Directiva cesarán nos seus cargos polas seguintes causas:

- a. Por dimisión, comunicada por escrito á asemblea
- b. Por perda da condición de membro da asociación
- c. Por destitución mediante acordo da asemblea xeral en sesión extraordinaria, convocada a este só efecto, en tanto se celebre a seguinte asemblea xeral. Será necesario o voto da maioría absoluta dos asistentes.

Artigo 20º.- O presidente da asociación serao tamén da asemblea, e terá as seguintes atribucións:

- a. Representar á asociación
- b. Tutelar a Oficina Técnica de Xestión
- c. Convocar e presidir as sesións da asemblea xeral, con voz, voto e voto de calidade
- d. Ordenar e autorizar pagos
- e. Asinar en nome da asociación cantos documentos públicos e privados sexan precisos para percibir calquera tipo de subvención, achegas derivadas de convenios e toda clase de cantidades e cobros por calquera concepto das Administracións Públicas e dos organismos delas dependentes ou doutras entidades, públicas ou non e para iso asinar os documentos públicos e privados que sexan precisos ou convenientes en nome da asemblea.

Capítulo IV DOUTROS ÓRGANOS DA ASOCIACIÓN

Artigo 21º.- A xunta directiva terá as seguintes atribucións:

- a. A aprobación do programa de traballo e proxectos da asociación
- b. A fixación e execución do orzamento tendo en conta as liñas marcadas pola asemblea xeral, segundo os recursos económicos dos que se dispoña.
- c. O nomeamento dunha Comisión Revisora de Contas que examine os balances económicos-financeiros e inventario dos bens da asociación e dea parte á asemblea xeral.
- d. Executar os acordos da asemblea xeral
- e. Decidir sobre cuestións reservadas á asemblea xeral en caso de extrema urxencia, debendo ser ratificadas ditas resolucións posteriormente pola asemblea xeral na seguinte sesión que celebre
- f. Velar polo bo funcionamento da asociación.
- g. As competencias que o presidente ou a asemblea xeral deleguen nela.

A duración do mandato dos membros de xunta directiva será de dous (2) anos, podendo seren reelixidos pola asemblea xeral seguindo os criterios do Título V art. 18 dos presentes estatutos.

Artigo 22º.- Secretaría e Tesourería

1. Son funcións da secretaría:
 - a. A función de xefatura dos servizos administrativos da Asociación.
 - b. Custodiar e levar ao día toda a documentación, arquivos e rexistros da asociación.
 - c. Levantar actas dos acordos chegados na asemblea xeral e a xunta directiva.
2. Son funcións da Tesoureiría:
 - a. Custodiar os fondos da asociación e levar en orde a contabilidade.
 - b. Dar cumprimento ás ordes de pagamento que expida o presidente.
 - c. Confeccionar os orzamentos anuais, os estados de contas e os balances da asociación.

Artigo 23º.- A asociación poderá dispor dunha Oficina Técnica de Xestión asumindo as responsabilidades como órgano de xestión.

1. A Oficina Técnica de Xestión, dependerá directamente da xerencia, de conformidade coas directrices marcadas pola Presidencia, e establécese con orde a desenvolver coa maior eficacia técnica e profesional os obxectivos da asociación. De carácter eminentemente

profesional haberá de resolver, planificar e executar os programas anuais. As funcións da Oficina Técnica de Xestión, incluídas as de xerencia, serán desempeñadas por persoal ou órganos técnicos vinculados ás corporacións das que forman a xunta directiva da asociación ou por persoal contratado pola Asociación.

2. Son funcións da xerencia en virtude dos acordos previos, sen menoscabo das que lle fosen encargadas pola presidencia, as seguintes:

- a. Asistencia técnica á presidencia e coordinación xeral dos proxectos e das accións da asociación.
- b. Propoñer ao presidente as accións técnicas e profesionais propias dos obxectivos da asociación.
- c. Relacións de carácter técnico e profesional coas Administracións Públicas e entidades privadas.
- d. Convocar reunións técnicas en cantas ocasións fosen necesarias para levar adiante as propostas profesionais derivadas dos obxectivos da asociación ou dos compromisos profesionais que puidesen xurdir.
- e. Elaborar os orzamentos anuais con desagregación por accións concretas e o orzamento de gastos e mantemento da Oficina Técnica de Xestión.
- f. Auxiliar e asesorar á presidencia e aos concellos membro respecto das estratexias para desenvolver, documentos técnicos dá emitir e en cantas accións, plans e proxectos sexan de beneficio á asociación.
- g. Propoñer accións para a elaboración de produtos turísticos das cidades e establecer contactos e relacións coas empresas e servizos turísticos relacionados coa asociación.
- h. Planificar e organizar os programas anuais de traballo da Asociación en orde a conseguir os obxectivos que se expoñen para a mesma.
- i. Asistir e participar en cantas actividades e convocatorias públicas ou privadas sexan de interese para os obxectivos desta asociación.

TÍTULO V DO RÉXIME ECONÓMICO

Artigo 24º.-

1. Os recursos da Asociación procederán de:
 - a. As cotas ordinarias de carácter anual que serán proporcionais tendo en consideración o censo de habitantes dos concellos membros.
 - b. As achegas extraordinarias que deberán ser ratificadas polos respectivos plenos .
 - c. As subvencións ou doazóns que se reciban.
 - d. Os rendementos propios do seu patrimonio e derivados das súas actividades e publicacións.
2. As cotas ordinarias terán carácter anual e serán determinadas en canto á súa contía pola asemblea xeral. Fixaranse as contías tendo en conta os seguintes tramos por número de habitantes:
 - Ata 5.000 habitantes
 - De 5.001 a 10.000 habitantes
 - De 10.001 a 30.000 habitantes
 - De 30.001 a 50.000 habitantes
 - De 50.001 a 100.000 habitantes
 - Máis de 100.000 habitantes
3. O abono das cotas deberá realizarse no primeiro trimestre do ano, sendo causa de apercibimento a falta de pagamento das mesmas.
4. A asociación levará unha contabilidade que permita obter a imaxe fiel do patrimonio, do resultado e da situación financeira da entidade, así como cantas obrigacións contables determinen as normas específicas que resulten de aplicación a esta asociación.
5. O exercicio económico coincidirá co ano natural e terminará cada ano o día 31 de decembro de dada ano excepto no caso de disolución da asociación, nese caso o peche será o da asem-

blea que aprobe a disolución. A data de apertura do exercicio económico coincidirá co 1 de xaneiro, excepto no caso da súa fundación que será a data da súa acta fundacional.

TÍTULO VI MODIFICACIÓN DE ESTATUTOS

Artigo 25º.-

A modificación de Estatutos deberá ser aprobada pola asemblea xeral en sesión extraordinaria. Para a súa constitución válida, será necesaria a presenza, en primeira convocatoria, de dous terzos dos seus membros. Na súa segunda convocatoria, quedará constituída validamente con polo menos tres dos asociados.

O acordo de modificación adoptarase por maioría absoluta dos asistentes.

TÍTULO VII DISOLUCIÓN DA ASOCIACIÓN

Artigo 26º.-

1. O acordo de disolución deberá ser adoptado en sesión extraordinaria pola Asemblea Xeral convocada para o efecto, e por unha maioría absoluta dos asistentes. Son causas de disolución da Asociación:
 - a. Por acordo da asemblea xeral extraordinaria
 - b. Polas causas determinadas no artigo 39 do Código Civil
 - c. Por resolución xudicial e firme
2. Acordada a disolución, a Asemblea constituirase na Comisión Liquidadora, que procederá á liquidación da Asociación, repartindo o patrimonio social entre entidades benéficas, unha vez deducidos os recursos para o cumprimento das obrigacións pertinentes.

DISPOSICIÓN ADICIONAIS

1ª. En calquera outro suposto non recollido nestes Estatutos, aplicarase a vixente Lei Orgánica 1/2002, do 22 de marzo."

Debido ao ruído provocado por unha manifestación na praza do Concello prodúcese un receso da sesión dende as 18.06 ás 18.37 h.

Por parte do grupo do PP preséntase unha emenda solicitando que o representante na asociación sexa Gumersindo Pedro Galego Feal, o que non é aceptado pola alcaldía, quedando a emenda rexeitada sen mais.

Sometido o asunto a votación non foi aprobado logo de obter 6 votos a favor (5 do grupo do BNG e 1 do grupo mixto) e 12 votos en contra (7 do grupo do PP, 3 do grupo socialista e 2 do grupo Somos Fene).

4. Aprobación, se procede, da proposta de rectificación do inventario municipal: modificación dos asentos núm. 37 e 38 e creación do asento núm. 47

Consta no expediente a seguinte Proposta da alcaldía que foi ditaminada favorablemente por 3 votos a favor (2 do grupo do BNG e 1 do grupo mixto) e 2 abstencións (1 do grupo do PP e 1 do grupo Somos Fene) na Comisión de Dinamización Económica que tivo lugar o 27.03.2017:

"PROPOSTA DA ALCALDÍA

O pasado mes de marzo a secretaria municipal emitiu un informe núm. 30/2017 no que pon de manifesto a necesidade de rectificar o Epígrafe 1º Bens Inmóbles, Grupo 1 nos asentos 37 e 38 e creación do asento 47.

A necesidade de rectificación procede de que o inventario non recolle a situación xurídica dos locais do Castro unha vez que foron obxecto de segregación e permutados co IGVS no ano 2002 mediante

escritura núm. 110 do 30.01.2002 de segregación e permuta, senón que recolle a situación anterior de adquisición mediante escritura núm. 905 de cesión gratuíta de 08.11.1994.

O arquitecto técnico Evaristo Núñez García emitiu un informe do 8 de marzo de 2017 no que fai unha valoración dos bens co gallo da súa actualización no inventario.

É competencia do Pleno a rectificación do inventario, polo que propoño a adopción do seguinte ACORDO:

1º.-Facer as seguintes rectificacións nos asentos 37 e 38 do Epígrafe 1º Bens Inmóbles, Grupo 1:

- Asento 37:

NOME DO BEN: Local núm. 2 no Castro
NATUREZA DO DOMINIO: DEMANIAL, servizo público
ADQUISICIÓN, TÍTULO: escritura núm. 905 de cesión gratuíta de 08.11.1994
REXISTRO DA PROPIEDAD PONTEDEUME: Tomo 576 Libro 113 Folio 164 Finca 12154 Inscripción 2ª
SUPERF. CONST.: 106,78 m2
SUPERF. PARCELA/VIAL: 106,78 m2
VALOR: 22.534,85 €

- Asento 38:

NOME DO BEN: Local núm. 1 en "O Castro"
NATUREZA DO DOMINIO: patrimonial
ADQUISICIÓN, TÍTULO: escritura núm. 905 de cesión gratuíta de 08.11.1994
SUPERF. CONST.: 83,03 m2
SUPERF. PARCELA/VIAL: 83,03 m2
VALOR: 40.513,65 €
HISTORIA/CARACTERÍSTICAS/DESCRIPCIÓN:
O local contaba inicialmente con 317,22 m2. Mediante escritura núm. 110 do 30.01.2002 procedeuse á segregación deste local en 2: o local 1-A con 234,19 m2 e o local 1 con 83,03 m2.
O local 1A foi permutado polo local núm. 3 de 234,19 m2 propiedade do Instituto Galego da Vivenda e Solo na mesma escritura núm. 110 do 30.01.2002.

2º.-Crear o seguinte asento 47 do Epígrafe 1º Bens Inmóbles, Grupo 1:

Asento 47

NOME DO BEN: Local comercial núm. 3 en "O Castro"
ENDEREZO: rúa do Castro, 9
DATA DA ALTA: (introducírase a data do Pleno na que aprobe)
NATUREZA: URBANA
NATUREZA DO DOMINIO: patrimonial
ADQUISICIÓN, TÍTULO: escritura núm. 110 do 30.01.2002 de segregación e permuta
PLANOS DO INVENTARIO Nº: 24
REFERENCIA CATASTRAL.
REXISTRO DA PROPIEDAD DE PONTEDEUME: Tomo 576 Libro 113 Folio 171 Finca 12161 Inscripción 2ª
LINDES:
DIANTEIRO/NORTE: rúa de nove metros de ancho
TRASEIRO/SUR: parede de peche do local
DEREITO/LESTE: local del centro de transformación, parede de peche deste local que en parte separa da rampla de acceso ao sótano
ESQUERDO/OESTE: local comercial núm. 2
SUPERF. CONST.: 234,19 m2
SUPERF. PARCELA/VIAL: 234,19 m2
VALOR: 48.676,76 €
HISTORIA/CARACTERÍSTICAS/DESCRIPCIÓN:
O local ten como anexo inseparable e vinculado a praza de garaxe-aparcamento ubicada no sótano, sinalada como P-3 LOCAL COMERCIAL 3.

Fene, 21 de marzo de 2017
O alcalde
Juventino José Trigo Rey"

Sometido o asunto a votación foi aprobado pola unanimidade dos concelleiros presentes.

Á vista do resultado da votación, o Pleno acorda:

1º.-Facer as seguintes rectificacións nos asentos 37 e 38 do Epígrafe 1º Bens Inmobles, Grupo 1:

- **Asento 37:**

NOME DO BEN: Local núm. 2 no Castro
NATUREZA DO DOMINIO: DEMANIAL, servizo público
ADQUISICIÓN, TÍTULO: escritura núm. 905 de cesión gratuíta de 08.11.1994
REXISTRO DA PROPIEDAD PONTEDEUME: Tomo 576 Libro 113 Folio 164 Finca 12154
Inscripción 2ª
SUPERF. CONST.: 106,78 m2
SUPERF. PARCELA/VIAL: 106,78 m2
VALOR: 22.534,85 €

- **Asento 38:**

NOME DO BEN: Local núm. 1 en "O Castro"
NATUREZA DO DOMINIO: patrimonial
ADQUISICIÓN, TÍTULO: escritura núm. 905 de cesión gratuíta de 08.11.1994
SUPERF. CONST.: 83,03 m2
SUPERF. PARCELA/VIAL: 83,03 m2
VALOR: 40.513,65 €
HISTORIA/CARACTERÍSTICAS/DESCRIPCIÓN:
O local contaba inicialmente con 317,22 m2. Mediante escritura núm. 110 do 30.01.2002 procedeuse á segregación deste local en 2: o local 1-A con 234,19 m2 e o local 1 con 83,03 m2.
O local 1A foi permutado polo local núm. 3 de 234,19 m2 propiedade do Instituto Galego da Vivenda e Solo na mesma escritura núm. 110 do 30.01.2002.

2º.-Crear o seguinte asento 47 do Epígrafe 1º Bens Inmobles, Grupo 1:

Asento 47

NOME DO BEN: Local comercial núm. 3 en "O Castro"
ENDEREZO: rúa do Castro, 9
DATA DA ALTA: (introducírase a data do Pleno na que aprobe)
NATUREZA: URBANA
NATUREZA DO DOMINIO: patrimonial
ADQUISICIÓN, TÍTULO: escritura núm. 110 do 30.01.2002 de segregación e permuta
PLANOS DO INVENTARIO Nº: 24
REFERENCIA CATASTRAL.
REXISTRO DA PROPIEDAD DE PONTEDEUME: Tomo 576 Libro 113 Folio 171 Finca 12161
Inscripción 2ª
LINDES:
DIANTEIRO/NORTE: rúa de nove metros de ancho
TRASEIRO/SUR: parede de peche do local
DEREITO/LESTE: local del centro de transformación, parede de peche deste local que en parte separa da rampla de acceso ao sótano
ESQUERDO/OESTE: local comercial núm. 2
SUPERF. CONST.: 234,19 m2
SUPERF. PARCELA/VIAL: 234,19 m2
VALOR: 48.676,76 €
HISTORIA/CARACTERÍSTICAS/DESCRIPCIÓN:

O local ten como anexo inseparable e vinculado a praza de garaxe-aparcamento ubicada no sótano, sinalada como P-3 LOCAL COMERCIAL 3.

5. Aprobación, se procede, do expediente de aprobación do convenio interadministrativo de colaboración entre o Concello de Ferrol e a Mancomunidade de Concellos da comarca de Ferrol para a mellora do servizo da casa de acollida de Ferrol

Consta no expediente a seguinte Proposta da Alcaldía que foi ditaminada favorablemente na Comisión de Dinamización Social e Transparencia en sesión ordinaria do 31.03.2017 por 5 votos a favor (2 do grupo municipal do BNG, 1 do grupo Mixto municipal, 1 do grupo municipal Socialista e 1 do grupo Somos Fene) e 2 abstencións do grupo municipal do PP:

“

Na sesión do Pleno da Mancomunidade de Concellos da Comarca de Ferrol de data 11 de abril de 2016 presentouse un borrador do convenio interadministrativo de colaboración entre o Concello de Ferrol e a Mancomunidade para a mellora do servizo da casa de acollida de Ferrol. Examinado o borrador o Pleno da Mancomunidade acordou trasladalo ao concello de Ferrol co obxecto de que se procedese á súa tramitación.

O Concello de Ferrol adopta o acordo de aprobar a sinatura do antedito convenio en sesión de data 29 de decembro de 2016.

Contando o convenio cos informes favorables da secretaría e da intervención da Mancomunidade, o seu Pleno en sesión de data 23 de xaneiro de 2017 adopta o acordo de aprobar o convenio interadministrativo de colaboración entre o Concello de Ferrol e a Mancomunidade de Concellos da comarca de Ferrol para a mellora do servizo de da casa de acollida de Ferrol condicionado á aprobación do mesmo por cada un dos concellos integrantes da Mancomunidade.

O 30 de xaneiro de 2017 entra por Rexistro Xeral do Concello (nº de rexistro de entrada 743) a notificación da adopción do acordo referenciado pola Mancomunidade así como copia do expediente aos efectos de que o Concello de Fene adopte o acordo de aprobar a sinatura do convenio de colaboración entre o Concello de Ferrol e a Mancomunidades para a mellora da casa de acollida.

A intervención municipal con data 28 de marzo de 2017 (informe de fiscalización 80/2017) informa favorablemente a sinatura do convenio.

Logo de ver canto antecede, propóñolle ao Pleno a adopción do seguinte acordo:

- 1.- Aprobar o convenio interadministrativo de colaboración entre o Concello de Ferrol e a Mancomunidade de concellos da comarca de Ferrol para a mellora do servizo da casa de acollida.
- 2.- Adquirir o compromiso de incluír nos orzamentos dos exercicios ao longo dos que se desenvolverá o convenio o importe correspondente ao Concello de Fene de conformidade co recollido no punto 2º do Convenio.

Fene, 28 de marzo de 2017

O alcalde

Juventino Trigo Rey”

Sometido o asunto a votación foi aprobado pola unanimidade dos concelleiros.

Á vista do resultado da votación, o Pleno acorda:

1.- Aprobar o convenio interadministrativo de colaboración entre o Concello de Ferrol e a Mancomunidade de concellos da comarca de Ferrol para a mellora do servizo da casa de acollida.

2.- Adquirir o compromiso de incluír nos orzamentos dos exercicios ao longo dos que se desenvolverá o convenio o importe correspondente ao Concello de Fene de conformidade co recollido no punto 2º do Convenio.

6. Mocións urxentes

O grupo do PP presenta unha moción para a creación dunha comisión informativa especial relacionada cunha investigación policial que se leva a cabo neste Concello.

Intervén a concelleira do grupo do PP Rocío Aurora Bértoa Puente para dicir que considera que no Concello se está a producir unha situación de especial gravidade con esta investigación sobre vendas de chatarra e a urxencia da moción motívase no desencadeamento de distintos acontecementos que levaron a declaracións de diversos traballadores, das cales tiveron coñecemento hoxe pola mañá. Consideran que neste asunto hai oscurantismo e falla de información, por iso presentan esta moción.

Resposta o alcalde que o Regulamento Orgánico Municipal (ROM) di que as mocións urxentes teñen que se presentar antes das 13.00 h do día anterior ao que se realice o Pleno e como é competencia do alcalde a fixación da orde do día rexeita a inclusión desta moción na orde do día ao non seguir o procedemento establecido. Engade, dirixíndose ao grupo popular, que mañá poden presentala no Rexistro.

De seguido intervén a concelleira do grupo do PP Rocío Aurora Bértoa Puente que di que o ROM tamén di que se poden presentar no mesmo día e que despois das 13.00 h de hoxe houbo acontecementos e o Concello non deu traslado da información, non dixo que traballadores ían ser investigados.

O alcalde resposta que mañá mesmo poden presentar a moción no Rexistro e que non é certo que se souberan hoxe disto, xa que o luns se lles deu información e se lles dixo que a xente comezaba a declarar e replica ao grupo popular que miren o que está a ocorrer hoxe coa manifestación convocada na praza do Concello por mor dunha moción de urxencia.

Remata dicindo que non hai motivo de urxencia para presentar esta moción agora.

A continuación toma a palabra o voceiro do grupo socialista Antón Lois Noceda Carballo para dicir, ante o rexeitamento do debate, que é a primeira vez que nun Pleno deste Concello se esixe este requisito legal, xa que sempre houbo absoluta tolerancia, polo que manifesta a súa protesta e apoio a que se debata.

Por parte do grupo Somos Fene, o seu voceiro, o Sr. Bastida, di que é increíble que non se debata, que acaban de saber deste asunto e non hai información.

O alcalde intervén para dicir que non se admite a moción.

A concelleira do grupo do PP Rocío Aurora Bértoa Puente formula a súa protesta a efectos dun posible recurso.

7. Rogos e preguntas

O alcalde di que os rogos e as preguntas pasaranse por escrito polos grupos para contestarse antes do seguinte Pleno, xa que a manifestación ao carón do Concello non permite escoitar.

Ao non haber máis asuntos que tratar, a presidencia declara rematado o acto cando son as 18.48 h, de todo o que, como secretaria, dou fe.

O alcalde

A secretaria

Juventino José Trigo Rey

Estefanía Manteiga Lamas